

Carta habri na tur partido politico cu ta participa na eleccion 2024, Aruba

G297

Preguntanan prioritario encuanto enseñansa

Respetabel Organisacion Politico,

Na vispera di eleccion venidero na cuminsamento di December, G297: Na Vanguardia di Enseñansa (G297), cortésmente ta dirigi su mes na boso Organisacion cu e fin pa pueblo sa boso ponencia y bista cla y raspa riba algun aspecto fundamental pa e sector di enseñansa. Di e manera aki, G297 kier duna un contribucion na e pueblo votado dor di publicamente dirigi na cada Partido Politico cu ta aspira pa un asiento o mas den Parlamento o pa e siguiente gobernacion 2025-2029 cu algun pregunta riba tereno di enseñansa.

Meta principal ta pa e pueblo votado tin un miho bista kico cada Organisacion politico tin como maneho pa e añanan nos dilanti relaciona cu enseñansa. Tur Organisacion politico ta ricibi e preguntanan por escrito; un suplica ta bay na cada uno pa publica e contestanan den medionan di comunicacion social.

Un copia di nos (G297) preguntanan nos tambe ta manda pa prensa.

PREGUNTANAN

1. Enseñansa comoinstituto ta instrumental pa desaroyo di un pais, tanto a nivel comunitario, como a nivel individual.

Boso Partido ta subraya e importancia enorme di enseñansa: Elabora pa nos: **dos punto**

protagónico ('hoofdpunten') pa enseñansa cu boso kier logra den e proximo termino di gobernacion.

Nota: inclui den boso contesta tambe: Dos **aspecto di orguyo** y dos **aspecto di lamento** den nos actual sistema di enseñansa.

Pone cu boso partido lo forma parti di e **proximo gobernacion**, ò formando parti di un coalicion, ò cu asiento den Parlamento: Menciona e **dos accionnan** di mas importante cu boso Partido lo kier ehecuta pa cu enseñansa den e prome 100 dia di gobernacion!

2. Enseñansa ta un asunto di maneho/responsabilidad propio desde 1954 (Antias), respectivamente 1986 (Aruba, Status Aparte).

E **rol** di Hulanda pa nos **propio maneho di enseñansa** (nos propio autoridad & profesionalnan) ta uno discutibel! Ilustrativo den esaki (desde 2021) ta e asina yama 'Landspakket Aruba' y e paragraf dedica na enseñansa.

Con boso Partido ta posiciona su mes pa cu e **rol di Hulanda** c.q. Landspakket, § Enseñansa?

Especificamente: Kico ta aceptabel y kico no ta aceptabel pa boso Partido?

3. Financiamiento/Presupuesto pa enseñansa: UNESCO ta propone como norma pa inverti anualmente minimalmente 6% di e GDP den enseñansa; desde 1986 ningun Gobierno a cumpli cu tal norma!

Con boso Partido ta opina encuanto e asina yama '**UNESCO-norm**'? Kico boso Partido ta bay haci al respeto, esta 6% di nos GDP?

Por favor, especifica e porcion (di 6% di GDP), cu boso Partido kier reserva pa enseñansa:

- e porcion cu ta bay pa cubri salario di e cuerpo di docentenan?
- e porcion cu ta bay pa cubri gastonan pa cu alumno/klas?
- e porcion cu ta bay pa cubri gastonan pa mantencion di scolnan?
- e porcion cu ta bay pa inversion/innovacion di enseñansa?

4. Idioma di instruccion: Papiamento.

Papiamento como materia (vak) y como idioma di instruccion den enseñansa.

Nos ta constata cu den e ultimo dos Gobernacion a haci hopi pa eleva Papiamento al respeto.

Con boso Partido ta opina encuanto e maneho hiba te awor pa cu Papiamento? Boso Partido lo continua cu tal maneho? Especifica tambe e rol/relacion di Papiamento pa cu e otro idiomanan: Hulandes, Spaño y Ingles.

5. Contenido (curiculo) di enseñansa.

Un curiculo escolar, cu'n orientacion nacional. Un reclamo di veld di enseñansa, no solamente maestro, pero tambe mayor y te hasta alumno, ta e echo cu e contenido di nos programa escolar ta demasiado '**ajeno**', *es decir*: nos ta siña mil-y-un-cos di otro pais y demasiado tiki di nos propio cultura, historia, geografia y comunidad.

Con boso Partido ta bay contribui pa nos por yega na un curiculo escolar cu'n **orientacion nacional** mas amplio? Boso por explicita algun area al respeto?

6. Salario di cuerpo di docente.

Ta existi diferente rapport pa cu restructuracion di e actual '**Salaris-verordening onderwijzend personeel**' cu ta hopi anticua/outdated; porfin un ordenansa nobo a bin cla, pero no a wordo implementa ainda.

Kico boso Partido ta opina di e ordenansa nobo pa maestronan di scol, principalmente e asina yama "inschaling" c.q. "salariëring" y kico boso Partido lo haci pa implementa tal ordenansa mas pronto cu ta posibel?

Gradicimento

Mirando e escasez di informacion riba tereno di enseñansa den prensa local relaciona cu enseñansa, G297 ta mira e oportunidad aki oportuno pa kibra e silencio. Di e forma aki e pueblo votado por haci un escogencia mas balansa p'e proximo eleccion.

G297 ta consciente cu di e forma aki no por cubri tur aspecto di enseñansa, sinembargo no por descarta e funcion fundamental di enseñansa pa un pais den continuo desaroyo.